



UKA 2019/223

2/10-2019

Nivi Olsen

**UPA2019-imut malittarisassat atuutsinnerini ersarinnerusumik aammalu aalajangersimanagerunissamik Namminersorlutik Oqartussat pigisaanni taamatullu suliffeqarfinni pigisat ilaanniittuni siulersuisunik ilaasortaataqartuni akissarsitinneqartarnerat pillugu politikikkut malittarisassanik aqqissuussinermi Naalackersuisut peqquneqarnissaannik Inatsisartut aalajangiiffigisassaattut siunnersuut.**

(Partii Naleqqamit Inatsisartunut ilaasortaataitai)

(Siullermeerneqarnera)

Qularutigineqassanngilaq siunnersuut ersarissuummat. Pisariaqarpoq siulersuisuni ilaasortat akissarsiaasa naapertuunnissaat paasiuminarnissaallu.

Siunnersuuteqartup assersuusiorpoq arlalinnik takutillugu oqallisigisariaqartoq ilumut akissarsiat ilaat naapertuunnersut - uangali tassunga tunngatillugu eqqartuussissanngilanga - kisianni akissarsiat paasiuminaatsinneqaraangata tamatigut apersuusersuingaatsiartoqartartoq nalunngilarput.

Demokraatini isumaqarpugut pikkorissunut piginnaaneqarluartunullu siulersuisuni sulinissaq pilerinartuussappat taava akissarsiat naapertuuttumik qaffasissuseqartariaqartut, peqataanilli isumagisassavarput akissarsiat suliarnut pisariaqartinneqartumut tulluuttuusarnissaat.

Isumaqarpugut pingaaruteqartoq ataatsimiititaliap suliassami aggersumi sulissutigisariaqaraa paasiuminarsaanissaq aamma pisariaqarpat allannguutissamik siunnersuuteqarnissaq, isumaqartoqarpat tamanna pisariaqartoq.

Siunnersuut suliareqqitassanngorlugi Inuutissarsiornermut Ataatsimiititaliamut ingerlateqqipparput.